

桂苑筆耕集



桂苑筆耕
集二十卷

四部叢刊集部

上海涵芬樓借印
無錫孫氏藏高麗
舊刊本原書板心
高營造尺七寸三
分寬五寸七分

桂苑筆耕序

淮南入本國無送詔書等使前都統巡官承務郎
侍御史內供奉賜紫金魚袋臣崔致遠進所著雜
詩賦及表奏集二十八卷具錄如後

私試今體賦五首一卷

五言七言今體詩共一百首一卷

雜詩賦共三十首一卷

中山覆瓿集一部五卷

桂苑筆耕集一部二十卷

右臣自年十二離家西返當乘桴之際亡父誡之曰

十年不第進士則勿謂吾兒吾亦不謂有兒往矣勤
哉無隳乃力臣佩服嚴訓不敢弭忘懸刺無違真詣
養志實得人百之已千之觀光六年金名榜尾此時
諷詠情性寓物名篇曰賦曰詩幾溢箱篋但以童子
篆刻壯夫所慙及忝得魚皆爲棄物尋以浪跡東都
筆作飯囊遂有賦五首詩一百首雜詩賦三十首共
成三篇爾後調授宣州溧水縣尉祿厚官閑飽食終
日仕優則學免擲寸陰公私所爲有集五卷益勵爲
山之志爰標覆簣之名地號中山遂冠其首及罷微
秩從職淮南蒙高侍中專委筆硯軍書幅至竭力抵

當四年用心萬有餘首然洵之汰之十無一二敢比披沙見寶粗勝毀瓦畫墁遂勒成桂苑集二十卷臣適當亂離寓食戎幕所謂饘於是粥於是輒以筆耕爲目仍以王韶之語前事可憑雖則傴僂言歸有慙息雀既墾既耨用破情田自惜微勞冀達聖鑒其詩賦表狀等集二十八卷隨狀奉進謹進

中和六年正月日前都統巡官承務郎侍御史內供奉賜紫金魚袋臣崔致遠狀奏

桂苑筆耕集一部二十卷

都統巡官侍御史內供奉崔致遠撰

桂苑筆耕集卷之一

表一十首

賀改年號表

賀通和南蠻表

賀達王除魏博表

賀封公主表

賀殺戮黃巢徒伴表

賀處斬草賊所能表

賀收復京闕表

賀殺黃巢表

賀降德音表

賀迴駕日不許進歌樂表

賀改年號表

臣某言今月某日得進奏院狀報奉十一日宣下改
廣明元年爲中和元年者展義龜城易名鳳紀美號

既新於曆象歡聲遍振於寰區臣某誠抃誠躍頓首
頓首臣謹案王制云天子西巡狩命典禮考時月定
日同律然則三秋啓候萬葉省方金郊興肅殺之風
玉壘應巡遊之地遂遵規於舉正爰降命於改元且
大戴禮曰中也者天下之大本和也者天下之達道
致中和天地位焉萬物育焉故漢益州刺史王襄俾
蜀詞人王褒作中和樂職宣布之詩以歌君德者舊
傳揚况及聖朝曾編新樂舉二月恬和之節播八風
調暢之音永驗休譚實諧昌運伏惟聖神聰睿仁哲
明孝皇帝陛下纂承寶位丕闡皇猷將務格苗暫勞

避狄風始行於地上易象可徵日再耀於天中休禎
斯在是以紀年有裕懸法無虧帝業中興則遠超於
前漢後漢物情允洽則近繼於元和太和足可使蠢
植昭蘇華夷悅服掩神雀黃龍之瑞應河清海晏之
期則彼叢尔叛徒騷然嘯聚偶縱煙塵之患即歸原
野之誅行迴西幸之儀便舉東封之禮臣今者既獲
成師以出必能仗義而行跡泛戈舡心馳劔閣冀陳
戎捷永賀堯年臨楚水以魂飛朝天可待望秦雲而
目極捧日為期末獲榮列朝班稱慶行在無任抃躍
戰懼屏營之至謹奉表陳賀以聞臣某誠歡誠喜頓

首頓首謹言

賀通和南蠻表

臣某言臣得進奏院狀報入南蠻通和使劉光裕等
迴雲南通和無進獻國信金銀器物正段香藥馬等
者天威遠振星使遄歸化外癡內黠之徒竭奉贊獻
琛之禮德既超於萬古恩已洽於四夷臣某誠欣誠
抃頓首頓首伏以聖主卜征既以用和為貴遠人從
化自知犯義不祥是得事尚從權德資舍垢言皆答
響禮不違經且南蠻嘗懷異謀久於邊患數年猾夏
獨虧控北之誠列鎮徵兵驟動征南之役則築虛可

慮怙亂難防今者鳳口銜書纔飛遠地狼心感德永
順皇風有以見皇帝陛下法古爲君視人如子以藏
疾匿瑕爲妙策以玩兵黷武爲良箴能昭利害之鄉
不失羈縻之道遂使要服修貢寶旅歸仁適當多事
之秋已見太平之兆則彼驃信實狗封之族尚革昏
迷賊巢迺蟻聚之群何難撲滅佇聆大捷永賀中興
必可驅堯舜而殿禹湯苑五岳而池四海盛矣美矣
念茲在茲臣頃者禦寇交州董戎蜀郡先則展馬接
討除之勢後乃設隨何說諭之機仰托皇威粗申將
略喜當今日免負初心限守藩條不獲稱慶行在無

任賀聖慈恩欣躍屏營之至謹奉表陳賀以聞臣某
誠朴誠躍頓首頓首謹言

賀建王除魏博表

臣某言臣得進奏院狀報二月二十二日恩除建王
可開府儀同三司兼太保充魏博節度使者維城茂
德列土殊勞遠分閩外之憂實表寰中之慶臣某誠
歡誠喜頓首頓首臣聆周歌麟趾漢譬犬牙固須地
處親賢方得天垂寵寄伏以建王修善為樂居高不
危好書而既擅多才獻表而肯慙求試今以勳稱上
鎮魏有大名將資磐石之宗遠錫分圭之寵豈獨漳

濱之俗遠荷恩威永令海內之人皆歌德業臣限守
藩鎮不獲稱慶行在無任踴躍屏營之至謹奉表陳
賀以聞臣某誠欣誠躍頓首頓首謹言

賀封公主表

臣某言臣得進奏院狀報奉去年十月十四日勅旨
皇帝第十一妹封遂寧公主長女封唐興公主次女
封永平公主待放復京闕脩禮冊命者芳舒玉葉寵
襲金根鬱佳氣於高天振歡聲於率土臣某誠欣誠
抃頓首頓首伏以遂寧公主德資元吉考祥於歸妹
之占唐興公主永平公主譽洽肅雍稟慶於降嬪之

典伴嫦娥於獨月分嬖女於雙星秀發青春光浮碧
落伏惟皇帝陛下齊家理國恭已敬親流鳳宸之殊
恩舉鸞闈之美命猶以暫勞仙蹕未復皇都留具禮
於宮闈待成功於千羽捧日而榮滋九族欽風而喜
播四方臣限守藩條不獲陪位稱慶行在無任抃踊
聳踴之至謹奉表陳賀以聞臣某誠喜誠躍頓首頓
首謹言

賀殺黃巢徒伴表

臣某言臣得進奏院狀報北路軍前定難軍節度使
拓跋思恭保大軍節度使東方逵等奏宣君縣南殺

戮逆賊黃巢徒伴二萬餘人，生擒三千人，并賊將者。又鳳翔節度使李昌言奏，探知京中賊徒潰散。六月十三日，皇帝御宣政殿，排仗受宰臣及百僚賀禮。畢者，睿謀遠叶，戎捷遄陳，雉扇而儼皇威，舉馮旋而恭列辟天。淳喜氣，地匝歡聲。臣某誠喜誠抃，頓首頓首。伏以逆賊黃巢，爾聚克狂，偷生晷刻，養姦而惟日不足。恃暴而謂天可欺，敢驅螻蟻之群，累拒熊羆之衆。孽唯自作，罪欲何逃。拓跋思恭，東方達等，身居重位，手握雄師。氣吞蠡彼之徒，志解赫斯之怒。齊駢於六步，七步果剗於左之右。之戰于野，而騰威戎難伏。

恭拘諸原而騁勇勢若焚枯不唯剝面春喉乃得連
頭係頸况李昌言鎮於歧下伺彼京中識虞譚鷹集
之祥辨師曠鳥聲之樂遂飛吉語遠達宸聰行者大
戮之期克踐中興之運伏惟聖神聰睿仁哲明孝皇
帝陛下財成三極救叙九疇出震位而臨人方瞻堯
日幸坤維而罪己更闡舜風暫勞遵養之師遙委仁
賢之將既誅逆黨爰列賀班濯錦江邊已睹霞舒綵
仗蒼龍闕下即聆雷振奎音永清四海之波遍灑九
天之澤臣謬操鈇鉞尚默鼓鼙未唱凱歌唯知抃舞
願彭野之久妨道路怒髮雖衝望秦原而將滅煙塵

愁眉已展臣限拘守鎮不獲稱慶行在無任欣抃聳
踴屏營之至謹奉表陳賀以聞臣某誠歡誠躍頓首
頓首謹言

賀處斬草賊阡能表

臣某言得進奏院狀報西川都將高仁厚部領兵馬
收捉草賊阡能已於十月十八日並處置訖二十一
日聖駕出羅城北樓宣慰迴戈將士各賜優賞放歸
本營者遠耀日旗高張天網梟師已歸於大戮鴻圖
永耀於中興臣某誠歡誠抃頓首頓首臣伏以草賊
阡能跡陷迷津心辜聖澤短於稔射人之毒瘼狗喧

吠主之聲高仁厚逐惡志雄擒奸氣勇仰資睿略靜
剗克徒伏惟皇帝陛下有罪必誅無思不服歌採薇
而遣卒念破竹之成功親降如綸之言遍安被練之
卒妖氛息而綿山益翠喜氣浮而錦水先春自此遠
振軍聲深摧寇黨覆頑巢而在即迴法駕以何遙臣
方事專征先聆吉語限拘藩鎮不獲稱慶行在無任
踴躍屏營之至謹奉表陳賀以聞臣某誠歡誠喜頓
首頓首謹言

賀收復京闕表

臣某言臣得河中節度使王重榮牒報四月十日當

道與鴈門節度使李克用及都監楊復光下諸都馬
軍齋入京城與賊交戰約殺却賊步軍一萬餘人其
馬軍賊便走出城往東南路去其賊軍家口錢帛並
皆遺下黃巢亦未知存亡其逃遁賊徒尋差兵馬追
奔並已收復京闕訖者天威耀武月捷傳聲望宸階
而初奏凱歌舉區宇而咸增抃舞臣某誠喜誠躍頓
首頓首臣竊窺曩代旁採前經靜理邦家必須以殺
止殺保安社稷固在雖休勿休是故不得已而用兵
無所私而煦物伏惟皇帝陛下纂臨寶位丕闡宏圖
匝四溟而不見揚波安九野而皆能偃草而乃逆賊

黃巢暗遵邪徑深入禍門久騰吠噪之聲敢恣穿窬
之便穢黷宮闕淹延歲時偷安暫戲於鼎中戮暴難
逃於机上今者風行睿略兩集王師揚復光任在信
臣李克用名為勇將各思報効競奮驍雄齊心而覆
滅巢巢戮力而尅收鳳里賊巢拒輪不暇亂轍潛奔
干戈則零散風飛金帛則填街塞巷更展追遊之勢
必擒稔惡之徒自此日月重光煙塵永息唯望宸遊
之返駕佇觀盛禮於登封臣職忝董戎功慙徇難雖
手無重柄數年虧奮擊之能而耳得嘉聲遠地倍歡
呼之功臣限拘藩鎮不獲稱賀行在無任手舞足蹈

慶抃屏營之至謹奉表陳賀以聞臣某誠喜誠躍頓
首頓首謹言

賀殺黃巢表

臣某言臣得武寧節度使時溥狀報逆賊黃巢尚讓
分隊並在東北界於六月十五日行營都將李師悅
陳景瑜等於萊蕪縣北大滅羣兇至十七日遂被賊
將偽僕射林言梟斬黃巢首級并將徒伴降部下都
將李惟政田球等訖其黃巢函首已送行在者聖日
重耀狂氛暗銷戎捷超於古今歡聲振於夷夏臣某
誠抃誠躍頓首頓首臣伏以歲有四時則秋行肅殺

之令武有七德則兵貴禁戢之能是故歲以無相棄
而克成兵所不得已而方用自革結繩之政皆勞祝
網之仁賊巢食土懷頑含沙稔毒深犯天紀廣地
灾九州則半致侵凌三輔則久經穢黷擢髮而既難
數罪眷喉而只待懲姦今者窮寇迴心元兇投首殺
傷老少歸附居多有征無戰之言實符王道以靜待
勞之勢深叶軍機伏惟皇帝陛下運啓中興功資下
武睹天鑒而實為大警聽風謠而非止少康永當銷
干戈之鋒便可鑄耒耜之器况迺西山八國數年飽
巡幸之恩東岳百神終日渴登封之禮佇迎雲馭俯

納巖音臣密通冠戎撫安疆境不暇爭鋒而進實防
代俎之譏慙虧犬馬之勞喜睹鯨鯢之截手舞足蹈
魂飛膽揚臣限守藩條不獲奔走稱賀行在無任慶
抃兢越之至謹奉表陳賀以聞臣某誠歡誠喜頓首
頓首謹言

賀降德音表

臣某言臣得進奏院狀報司天臺奏六月十六日夜
太陰虧伏奉六月二十三日德音應三川管內見禁
囚徒等宜委所在長吏五日內踈理決遣其京畿四
面暴露骸骨宜委諸鎮切准前後勅旨差人收拾埋

瘞者望舒匿影曲赦流息化洽汝辜義資掩骼振歎
聲於蜀壘蕩妖氛於秦川臣某誠朴誠躍頓首頓首
臣伏以日能順晷而照臨不失其所月以順時而盈
缺則維其常况當萱葉初凋桂輪自減兵銷下土非
石麟暗闢於東陵請見上天致玉兔暫虧於西汜既
同君子之過乃軫聖人之憂伏惟聖神聰睿仁哲明
孝皇帝陛下光闡睿圖保寧區宇仁能及遠德以勝
妖爰當履義之辰克舉眚災之典慈傷瘦死牢囚免
滯於風霜義貫幽魂道殫皆沾於雨露可使涪水耀
千年之色巴山呼萬歲之聲道能繼於垂衣法無好

於委轡行迴巡幸仰賀登封臣限守戎藩不獲稱賀
行在無任扑躍屏營之至謹奉表陳賀以聞臣某誠
歡誠喜頓首頓首謹言

賀迴駕日不許進歌樂表

臣某言臣得進奏院狀報伏審勅旨迴駕日應沿路
州縣切不得輒進歌樂及屠殺者聲除飾喜味減薦
珍遠遵罪已之言深播好生之德凡於蠢動孰不歡
呼臣某誠扑誠躍頓首頓首伏惟皇帝陛下日月運
行雷雨作解體堯舜之理能咸若法禹湯之興必勅
焉退庭舞而撤宮懸惡衣服而菲飲食一慈二儉守

玄祖之格言沐雨搦風稟太宗之丕訓今則冕旒東
顧挫朽西移師乙收心無以逞錘鑄之曲庖丁斂手
何由挫敵鯨之形義感六牲息加萬姓則乃蜀山力
士既無煩役之虞漢水老人豈有深譏之事帝業永
資於下武物情皆慶於中興臣方擁戎旃阻隨仙蹕
遙思盛禮空馳拱北之誠願報深恩但勵鎮南之志
無任抃躍屏營之至謹奉表陳賀以聞臣某誠歡誠
喜頓首頓首謹言

桂苑筆耕集卷之二

謝加太尉表

謝示南蠻通和事宜表

謝立西川築城碑表

謝御制真贋表

謝御札衣襟并國信表

謝就加侍中表

謝賜宣慰兼加侍中實封表

請巡幸江淮表

請巡幸第二表

讓官請致仕表

謝加太尉表

臣某言今月某日宣慰使供奉官嚴遵美至奉宣聖旨慰諭臣及將校等并賜臣勅書手詔各一封加臣檢校太尉依前充淮南節度使兼東面都統者仰窺

鳳詔謂對龍顏寵榮極而何力負山戰灼深而自容
無地臣某誠抃誠感頓首頓首臣伏以大司馬之威
權百官所仰上將軍之法令十道皆遵豈唯整戢五
兵實在諧和七政况當今日宜屬全材如臣者德乏
潤身智虧周物於儒則筆慙五色在武則劔敵一夫
但以荷寵天庭分憂水國擁旄重寄榮冠絕於一時
仗鉞專征翼折衝於萬里幸逢聖鑒得盡忠誠今者
已率雄師將誅巨猾征旗指路遠趨堯日之光戰艦
凌波方託舜風之力豈期王人遠降帝命俄臨獎其
外鎮之微勞授以上司之劇任未著緇衣之義旋叨

錦被之榮况乃兼制利權廣潤軍食瑞節不移於南
充兵符亦縮於東陸將何異能勝此寵寄謹當冰為
夕飯藥作朝餐寒帷則面撫烝黎建旆則身先士卒
群寇既蝟毛而起偶恣倂張諸侯必馬首是瞻共成
剪滅唯力斯視何心自安必也臨亂忘身見危致命
仰解焦勞之念粗申式遏之功臣既當下瀨屯師行
欲中流設誓枕雕戈而輟寐跡寄轅門瞻帝座以馳
誠魂飛輦路未獲稱謝行在無任感恩戀聖榮并戰
懼之至謹因宣慰使嚴遵羨迴附表陳謝以聞臣某
誠感誠懼頓首頓首謹言

謝示南蠻通和事宜表

臣某言二月二十六日宣慰使供奉官李從孟至伏
奉勅旨入鶴拓使曹嗣王龜年閤門使劉光裕等迴
得驃信表并國信兼布燮揚奇肱與西川節度使書
皆備述情誠無不順命其表及書白并荅信物數並
令錄往此事首末自卿良謀者遠降王言深窺使節
跪闕上天之旨坐知外域之心寵餽踰涯憂惶若厲
臣某誠并誠躍頓首頓首臣才非間代智不濟時但
以每鎮窮邊粗安荒服免使飽飛飢附欲令前倨後
恭頃者忝守成都冀申遠略遂憑釋子善諭蒙王仰

稟天威得揚風教永戢干戈之患俾陳玉帛之儀雖
羣議沸騰竟銜鑠金之口而宸衷剴斷早推匪石之
心是以暫事西巡或虞南叛爰遣維城貴胄直閣近
臣迴聖德以降尊遠傳玄化譯訛言而獻欵倫寫真
誠既令抱義戴仁果見奉琛執贄此皆陛下威德臣
何力之有焉而迺謂臣有先見之能知未來之事設
和蠻之良策備幸蜀之嚴城俯錄勤勞迺垂稱獎睹
雕題之章奏書執既同息楮夏之猜嫌梯航相接驗
南賧之贖咎知北極之紓憂雖云五利有餘敢希茂
賞唯願四方無事永贊昌期臣限守藩俗不獲稱謝

行在無任欣躍感戴兢惕之至謹因供奉官李從孟
迴附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度使
日創築羅城昨因有勅嘉獎方進所賜碑詞今已付
所司鐫鐫建立者一片石文龜初戴立九重天語鳳
已銜來雕銘莫繼於色絲龍飾遽超於華袞仰窺恩
獎俯抱憂惶臣某誠感誠懼頓首頓首頃者幸夢三
刀久臨益部遙提一劍得挫蒙兵但其玉壘可稱
金城未設山口則空吞蠻蜚水頭則斜枕捷犂含漢

抱谷之形雖云天險比屋連甍之勢實類野居臣是以運度籌謀斟量板築蓋從人欲果致子來遂得後興而草偃川中誠感而土生石上長圍於三十六里高鎮於百千萬年不愧鐵名可將鏃試隼墉烏堞儼若鸞飛錦浪綿峯迥然裝飾遂蒙陛下辱褒稱之重許刊勒之榮以爲事實可觀足得詞華不朽臣雖遇泥封激賞豈將油素矜誇非敢彰謙所期避謗今者伏遇皇帝陛下遠巡勝槩親覽微功徵舊賜之碑詞命新鐫之筆跡永使卓立琴臺之境平欺劔閣之銘且杜元凱之峴亭無非自銜阮德規之齊國蓋是衆

成謾傳身後之虛名豈睹目前之盛事曷若彰毫見
獎翠琰斯刊因成下土之功終應上天之意得逢今
日別振孤風向非陛下錄善息深酬勞德厚則何以
未有出師之業篆刻叨榮曾無興學之規傳揚竊羨
臣限拘鎮守不獲稱謝行在無任感戴欣躍戰懼之
至謹奉表陳謝以聞臣某誠惶誠恐頓首頓首謹言
謝賜御製真贊表

臣某言二月二十六日宣慰使供奉官李從孟至伏
奉勅旨已令於大慈寺卿真院寫朕真并扈從宰臣
等真列卿儀貌俱會此堂今先寄卿真軸并朕親製

贊述賜卿冀表顯恩式彰異禮者銀璫降使玉簡傳
詞受宣而頂踵光輝拜賜而神魂驚越臣某誠感誠
懼頓首頓首臣志欽涓訣業鍊北書敢憑涓滴之勞
自安寵寄願掃氛霧之患永竭忠誠遂在先朝便從
戎役南征北伐豈暇寧居東鎮西藩累叨重任遇陞
下龍飛之後委微臣隼擊之能蜀國防蠻則粗申遠
略楚宮捍寇則偶遂良機旋令移節於海門復許建
牙於淮甸是以常拘戎闔未覲宸階唯披天上之詔
書似睹日中之玉宇空增戀闕莫遂歸期頃者虔託
仁祠駕留慶質豈致去思於舊鎮唯慙取笑於空門

伏遇陛下展義陳詩停銜駐蹕遂徵繪事俾駕聖容
其於侍從之臣宜居左右豈料孱微之質得潤丹青
愧無驚頷之姿永侍龍顏之側况蒙宸襟顧矚御筆
贊揚高題而素壁爭輝卓立而浮埃不染然後遠飛
寵詔特遣貴臣乍捧絲牋驟竊游揚之譽初開寶軸
深驚刻畫之思窺看而形影自慙感激而肺腸何極
昔漢朝中興聖帝下念功臣列形像於禁宮載勳名
於史筆雖令贊述不自稱揚豈如陛下暫事巡遊迥
垂獎飾別降絲綸之命親編錦繡之詞俾臣位掛於
鳳凰池中名超於麒麟閣上遐尋故實獨荷殊榮有

何出衆之能見此非常之寵所謂千年嘉遇萬代美
譚唯當志勵風霜永驗松筠之不改身霑雨露免憂
蒲柳之先衰臣限守藩條不獲稱謝行在無任感思
戀聖榮躍兢懼之至謹因供奉官李從孟回附表陳
謝以聞臣某誠惶誠恐頓首頓首謹言

謝御札衣襟并國信表

臣某言二月二十六日宣慰使李從孟至伏蒙聖恩
別賜臣御札衣襟并御服衫一領龍腦香一金合金
釵花散梳一口金花銀盞一隻者 窺神筆思襲御
衣仙香氣撲於鼻根寶器光騰於眼界仰霑寵錫俯

積憂兢臣某誠感誠懼頓首頓首臣每念業紹弓裘
任叨斧鉞誓傾忠節終報聖朝去年親率驍雄願殲
兇醜旋承綸音已駐舟師既慙叩楫之言徒切枕戈
之望豈期貂冠傳命龍袞裁書辱宣尼一字之褒過
光武十行之詔加以粉分御筭香滿雕奩花錐乃麗
水之珍雪透任山之器捧玩而實驚寮吏緘藏而
永耀子孫雖有幸逢時輝榮驟集而無功受賞愧耻
難居徒荷鴻私何申豹略身依楚水未陳告捷之書
目斷蜀天但灑感恩之淚臣限守藩鎮不獲稱謝行
在無任荷戴激切榮抃兢懼之至謹因供奉官李從

孟迴附表陳謝以聞臣某誠惶誠恐頓首頓首謹言

謝加侍中表

臣某言臣伏奉去年十一月十一日恩制加授臣侍
中依前淮南節度使階勳封並如故仍加食實封一
百戶者有命自天處身無地感深以迄寵極而驚臣
誠朴誠懼頓首頓首伏以黜陟分科聖君至教行藏
守道達士良規慮受爵以斯亡在持盈而不殆臣自
提摧筦便遇兵戈郡邑為征戰之場山海足逋逃之
藪既難聚利莫遂成功况乃權有他門刃無餘地動
見越危代俎無非避柱觸楹遂虧漕輓之程僅壞銅

鹽之法伏蒙皇帝陛下俯詳直道不實嚴誅選用良
才改移重務而乃察臣在公之節念臣戀主之誠重
委將壇更增封邑恕之一時之秀許攀七葉之榮唯
慮慙卿或譏竊位然臣今所以自賀者三朝獨立七
鎮榮遷每當拜爵王庭不省謝恩私室以茲勵已永
免愧人謹當激葭壯圖殲夷窮寇粗息四方之患仰
寬萬乘之憂臣限守藩條不獲稱謝行在感恩戰灼
屏營之至謹奉表陳謝以聞臣某誠慙誠懼頓首頓
首謹言

謝加侍中兼實封表

臣某言六月十六日供奉官劉叔齊至奉宣聖旨慰
諭臣及將校并賜臣勅書手詔各一封官告一通就
加臣侍中仍加食寶封一百戶餘如故者自天降命
無地安身啓鳳詔而魂驚對貂冠而股慄臣某誠感
誠懼頓首頓首臣早因薄效每忝殊榮勤王而素乏
實勤受爵而但多虛受員山寡力臨谷戒心况自我
馬生郊陣蛇出穴妖氛蔽闕法駕省方臣久鎮雄藩
嘗提重柄一無成績兩拜龍章前者以上將軍爲大
司馬今則兼納言之任加真食之榮累年虧橫草之
功終日抱伐檀之耻且易曰或錫鞶帶終朝三褫之

詩云受爵不讓至于已斯止遍覽格言是懲貪祿不
能報國苟欲榮家臣實何心有覲于目但遇王人遠
降聖澤傍流仰睹綸音深嘉軫政以爲師徒輯目黎
庶安寧俯念忠誠特行懋賞臣也方寸之地可倚咫
尺之顏不遠豈敢矯俗陳情飾詞讓爵難效一辭而
退唯期三命益忝既除勞力於利權終願勵心於閭
寄臣伏限守藩不獲奔赴行在稱謝無任感恩戀聖
戰汗屏營之至謹附供奉官劉叔齊奉表陳謝以聞
臣某誠惶誠恐頓首頓首謹言

請巡幸江淮表

臣某言伏以舜伐有苗修德而終能率服湯征自葛
行息而競望來蘇斯皆今古之美譚實乃帝王之盛
事固敢跼天負責向日裁誠仰陳利害之端冀副華
夷之望不量狂瞽速黷聖聰臣某誠惶誠懼頓首頓
首臣聞日月以運行為德永麗于天江河以委輸是
期必朝于海上能昭其煦育下方遂於通流况乃天
灾非人力能除地分有兵戎不起將獻永安之兆輒
陳可復之詞伏自寇陷上京兵微外鎮猛銳始從於
鶴列旒鼓徒歸頑兇尚固於蟻封難成盡殪臣豈唯
投袂實至衝冠昨率舟師誓屯江次必欲朝離楚岸

暮及漢濱旗張商嶺之風劍拂秦川之霧願言薄伐
冀效微勞尋蒙陛下遠許分憂不令離任臣進退惟
命始終無虧寧招曠職之譏敢涉爭功之責又緣淮
海乍息烟塵忽若去兵必當致寇則迺江南沃壤盡
成蚕食之資淮北強隣暗展鯨吞之勢輿賦既無所
倚軍須將必屢空是以仰奉勅書已班師旅四境之
赤眉歸伏八洲之黔首謐寧邇布皇恩粗申將略然
而關中緹敵閭外偷安既非踴躍以身先每切忸怩
於顏厚伏惟皇帝陛下省方展義駐蹕經時龜城壯
麗之形金湯雖固鳳輦巡遊之費桂玉可虞况舊謂

西川富強祇因北路商旅託其茶利贍彼軍儲今則
諸道羨表章則半載始迴徵貢獻則經年未達實緣
道路遼夏無值干戈阻難值剽掠者斯多至行朝者
甚少加以僦雇所費耗蠹不輕每當水運陸般只可
率鍾致石以此征稅則漸成抗弊軍兵則未遂飲饒
伏慮扈從實繁宴犒仍廣盡搜資於三蜀難濟用於
百司苟興旰食之憂實恤庶寮之望又以蜀川僻居
印棘人密通蠻戎虺毒潛吹獸心難測儻或乘虛
犯境率衆渡瀘六軍之熊豹騰威縱能制敵八詔之
豺狼作暴不免喧驚事可酌於將來禍須防於未兆

伏惟陛下覽臣忠懇察臣直言暫迴西幸之儀更舉
南巡之禮使處處息後予之怨人人安恋主之心天
下幸甚天下幸甚且如遠狩河陽僞遊雲夢將興霸
王俯順權宜况江淮為富庶之鄉吳楚乃繁華之地
陛下九年理國四海為家豈比周之東遷非擬晉之
南渡賊巢寃在久聚穢黷難除縱便收城未宜迴駕
豈如揚都粵壤桂苑名區四夷之賓易朝天九牧之
貢無虛月伏乞陛下俯迴鳳宸略泛龍舟必想山靈
卷三峽之風水伯寢九江之浪遐尋禹跡允叶堯巡
昔也日耀錦川天不傾於西北今則風行澤國地無

缺於東南然後發使清宮舉章司隸振盛儀於歸闕
告休績於登封臣雖識昧變通而志勤匡濟敢憑草
奏輒貢管窺無任戀聖感恩戰越屏營之至謹奉表
陳請以聞臣某誠惶誠懼頓首頓首謹言

第二表

臣某言聞聖人能以天下為一家以中國為一人者
必闢於其義達於其患然後能為之臣遂自前年繼
陳短識請移車駕巡幸江淮計資於避險就安事叶
於暫勞永樂未迴聖鑒再獻瞽言臣某誠懇誠懼頓
首頓首臣尚阻撓奸敢言伐善然但願愚夫之一得

難追賢者之三思臣頃鎮成都偶諧遠慮克符天意
亟就土功別營雉堞之雄規永壯龜城之峻境爰憑
釋子善誘蒙王果俊倔強之愆便付懷柔之信皆資
帝力能肅物心伏遇陛下遠耀珠旗高臨玉壘樂降
絲綸之旨深嘉毫髮之勞謂臣有先見之機念臣以
至誠所感仰銜膺獎倍激忠誠然明當年已往之功
粗成籌畫今日未來之事竊有管窺首或緘辭則為
負德不辭鼎鑊輒貢芻蕘臣近者俯察時情仰瞻乾
象荊州道路群寇將侵蜀國封疆微災似起儻或未
收鳳闕尚駐奎輿忽有妖氛潛興近境必恐烏合蚕

食之徒占據江陵把斷峽路則列鎮貢賦無計流通
行在詔書亦難傳降若見東西阻絕固當遐遁動搖
伏惟陛下斷自宸衷斥其橫議念江淮之進獻遠涉
多虞察蠻延之奸克乘虛可懼早移仙蹕直幸揚都
滅星辰交錯之灾叶日月運行之理則乃九州斧鉞
討戎而齊願風駭四海梯航奉贄而必能雲集感矣
美矣念茲在茲且逆賊黃巢久黷皇居多成穢跡直
到虎收之後須勞繕葺之功更俟二三年之間可興
千萬世之業慮不先定事難速成伏乞陛下覽竭節
之言聞隨時之義俯從衷懇暫事宸遊天下幸甚天

下幸甚臣粗識古今略詳利害自非激以為智豈敢
知而不言謹奉表陳請以聞臣某誠惶誠懼頓首頓
首謹言

讓官請致仕表

臣言臣伏以聖君御宇必先塞彼倖門良士省躬唯
慮妨其賢路苟速官諉是辜主息况臣關中無定難
之勲閭外乏分憂之效強欲晏安寵祿其如玷浼刑
章永言量力而行固在奉身以退既知無隱寧避有
辭臣某誠慙誠懼頓首頓首臣少勵琢磨晚師擒縱
不以一經介意粗於三略留心願紹家勲免虧堂構

先皇帝念臣孤直試以諸難出分大將之威權坐受
上卿之爵秩故得內稟幸修之訓外伸式遏之能北
掃虜庭則胡雛不敢南牧南清獠海則蠻謀無由北
窺及覲彤墀暫司緹綺俄屬齊郊聚斲鉅野興師臣
也不才謬膺斯任伏遇皇帝陛下纂臨宸極警諭戎
藩舉旌鉞以分勞聽鼓鼙而軫念謂臣有戢兵之奇
略察臣立降寇之微勞遂令位假中台名編外相夢
想既通於鳳沼威稜益峻於龍旌其後瀘水波驚蜀
山霧暗久念雕題之患遍流黔首之灾又蒙命臣曰
俞為帥於彼爰遵薄伐得解倒懸豈敢貪天之功願

銘鍾鼎祗能因地之利別建溝隍伏蒙陛下俯獎忠
誠特行懋賞開國授周司徒之貴立家紹漢丞相之
榮臣此時早誠持盈輒思請老必願告休錦里退隱
羅浮不料墮上耕夫盡解揭竿斬木草間惡子競謀
蟻聚蜂飛當荆門失守之時乃楚塞宿兵之際忝趨
戎旆兼縮牢盆倂悅而未能報息駢馳而何敢言病
或楔瑜磨牙於原野或鯨鯢噴毒於江湖尋提招討
之權來撫甸吳之俗遠憑睿略深挫群兇洎解印海
門建牙雄甸上將軍之劇任首冠列藩大司馬之雄
資先沾宥禮拂頂踵而偏濡雨露扼咽喉而莫效消

埃且自黃冠憑陵翠華巡狩仰天戮力竊嘗服王導
之言終日痛心何止洒素安之淚及至成軍已出又
緣奉詔却迴行藏雖順於綸詞進退實慙於物論遂
見時溥興北林戎役周寶致南鄰責言玉每慮於俱
焚金亦憂於衆鑠幸蒙陛下涵之以海量炤之以天
光如見肺腸得保首領然臣也先軫以直言逞志曹
植以深過責躬則二年忝都統之名不能誅奸戮暴
四載主銅監之務不能富國贍軍是以兵權則屢見
改移利柄則變為分割凡此辱君之命莫非職臣之
由臣猶自知况在陛下擢髮而既難數罪乞骸而誰

顧辭榮今者大憲奔赴上京克復氣稜即當殄滅索
區永見廓清臣有忝登壇無能報國行當暮齒居亦
胡顏兼以頃鎮蠻陬久接瘴嶺蒙犯其妖烟毒霧刻
除其封豕長蛇當年而靡憚勤劬晚歲而皆成疾疹
不將筋力為禮既載前經苟或身心自讎難逃後患
雖思強飯實愧素餐廣陵為楚澤上游醴府乃漢朝
大任以臣衰老當此重難必恐終無所成遂希不可
則止伏惟皇帝陛下知人為哲多士以寧選英才而
代處是邦俾微臣而退居散地闔於菟之迹富固是
忠貞王內史之辭官誠非矯飾幸遇舜風無外漢日

再中陛下既已除盱食之憂微臣亦希免夜行不息
臣無任望恩戀聖懇迫兢灼之至謹奉表陳請以聞
臣某誠感誠懼頓首頓首謹言

桂苑筆耕集卷之二

皇朝卷二

桂苑筆耕集卷之三

謝詔狀

謝詔示權令鄭相充都統狀

謝宣慰狀

謝詔獎飾進奉狀

謝詔示徐州事宜狀

謝詔止行墨勅狀

謝邾公甫充監軍手詔狀

謝除鍾傳充江西觀察使狀

謝就加侍中無實封狀
謝秦彥等正授刺史狀

謝詔狀

右臣伏奉四月十日詔旨黃巢亮逆穢黷宮城罪惡貫盈人神共怒尋東兵合勢剪滅元亮想副朕懷已

導道路行聞克復永耀功名者十行天語萬里星飛
捧窺而壯膽初驚跪讀而愁眉頓豁竊以黃巢禍心
斯極根力既衰肉已太醜果將落暨起烟塵之患
則歸原野之誅臣每當永夜枕戈早願中流叩楫自
啓行十乘已屯駐五旬伏緣江路多虞風波未便暫
淹行色用假良時非致役於遷延但興懷於矍鑠今
則仰觀鳳銜之詔况乘隼擊之秋俯勵軍謀仰遵膺
箒即翼朝離江北暮到漢南長駟背水之師永破滔
天之孽率奮義感息之衆氣已凌雲殄藏奸匿暴之
徒勢如沃雪伏惟陛下歲巡備禮時邁傳歌將示罪

於三危乃宣威於七德臣遠承獎諭誓盡勤勞身暫
寄於戈船心每馳於劍閣唯願西都獻捷早申收復
之微功東嶽告成得覩登封之盛事臣無任感激兢
懼之至謹奉狀陳謝以聞謹奏

謝詔示權令鄭相充都統狀

右臣伏奉去年九月九日詔旨卿曾間道獻章諸鎮
飛檄便欲長驅甲馬親議專征未即便來須權制置
遂命鄭畋等分為京城四面都指揮諸道師徒慮卿
偶未委知故茲詔示者伏以書曰無偏無黨王化乃
興詩云不識不知帝謀是稟况兵當伐叛事合從權

臣去年先因淮北侵疆後值江南阻路久屯師旅未
遂戰征陛下妙選群才近分重寄鄭畋等莫不身先
貔武手運豹韜既當怒髮爭衝固謂賊膏可搃仰酬
膚獎竟勵忠誠臣也遠鎮臨戎強隣結憾唯慙曠職
豈望成功伏蒙陛下尚念勤勞曲垂慰諭覩上天之
慈意解外地之憂深既許將軍獨舉柳營之令終期
叛卒必歸竹町之誅臣限守戎藩不獲稱謝行在無
任感激戰懼之至謹奉狀陳謝以聞謹奏

謝宣慰狀

右宣慰使供奉官李從孟至伏奉去年九月九日勅

書手詔無宣恩旨慰諭臣及將士等者伏以感恩効命武士常規仗順推兜元戎素分賊巢偶乘奸便尚道嚴誅臣願膾彼逆鱗鑿其邪膽掃重氛於魏闕迎法駕於蜀都是以去年據馬援之鞍敢矜獨勇救辛毗之鉞親率諸軍久在江干再承天旨不令離任遂已班師豈料伏蒙陛下念及老臣撫茲衆率特迺星使遠降泥封綸傳萬乘之言纖微不聞鑿彼百夫之體慰暖皆均歡呼而聲已振雷感泣而淚將成雨唯期勵節共願報恩臣限守藩條不獲稱謝行在臣無任感戴榮抃戰懼之至謹因供奉官李從孟迴奉狀

陳謝以聞謹奏

謝詔獎飾進奉狀

進奏院適到恩賜手詔一封

右臣伏奉詔旨以臣先 供軍應接使駱潛等進奉
銀事特賜獎飾者伏以收切示賞乃聖主之異恩需物
輸誠固藩臣之常事但屬敵滋隣境寇阻道遠運綱
而既闕先登贄禮而僅侷錫貢早成 滯况涉數微
是以雖憑孱水之珍難逭塗山之罪豈料鴻毛比價
方申懇悃之心鳳口銜書遠降褒稱之旨感激而懷
榮為懼揣備而報德何期臣限守藩條不獲稱謝行

在無任荷恩戀聖屏營之至謹奉狀陳謝以聞謹奏
謝詔示徐州事宜狀

右臣先奉詔旨據時溥奏卿本道羌兵侵境殺傷令
務止遏者臣遂具時溥誣謗事由申奏伏奉二月二
十五日詔旨今則寇孽不日勦除藩方務息爭競所
宜和叶各保封疆者臣伏以天德既高側管者固難
窺測日恩至廣戴盆者自阻照臨是以遠竭愚誠動
違聖慮時溥既銜膺獎得縱兵威早成熊據之謀更
展鯨吞之勢累興師旅來犯封疆焚郭邑於山陽掠
資財於淮上臣遂令搆禦略挫克狂而乃時溥奸計

已成根株巧言頗有枝葉不思已過敢惑宸聰今者
再奉絲綸仰遵徽纒唯期寬則得衆粗可和而不同
臣分闔無功戡兵為務至於草寇猶許歸降况是隣
藩豈謀侵擾彼無此詐此無彼虞臣限拘鎮守不獲
稱謝行在無任感激屏營之至謹奉狀陳謝以聞謹
奏

謝詔止行墨勅狀

右臣伏奉詔旨去春權降詔命許諸道承制除官已
兩度降勅止絕自今後凡有要甄獎者並於急遞奏
聞不得更議承制者臣伏以漢朝鄧禹始啓律門魏

室曹瞞敢專重柄欲竅於自家刑國所惜者唯器與
名伏遇陛下遠事宸遊慮防爵賞遂降無私之澤遍
資諸道之權不料人人而競弄華端處處而皆誇墨
勅長蛇封豕猶匿暴於神州狗尾羊頭已成群於列
鎮臣前年雖奉詔旨未欲施行却緣親率軍兵遠期
征討此時久屯南浦將泛西江忽被鎮海節度使周
寶欲感軍情潛施巧計便以無功將吏悉皆超授官
榮臣所領士卒既多將校不少彼安坐者猶為甄獎
此遠行者豈免怨嗟適口聲傳從頭憤激臣若不依
周寶必恐事生遂准詔書得行軍賞已曾一一具事

由申奏訖自奉前年十一月一日勅旨仰遵成命靜
守常規至於近日所招賊徒只與往時先賜官告曾
無僭越豈可隱藏今者外將忠誠永當無二大君善
教已至再三泣告而天何未聆憂懷而地謂可入臣
限拘藩鎮不獲稱謝行在無任戰越屏營之至謹奉
狀陳謝以聞謹奏

謝都公甫充監軍手詔狀

伏奉某月日勅書手詔各一封

右新授當道監軍都公甫四月十日到伏蒙聖恩賜
臣勅書手詔兼慰喻臣及將校等九天降詔萬里宣

恩柳營之列將歡呼挂苑之群寮感泣伏以都公甫
素懷材略久撫軍戎漢南之職業可觀江北之物情
獲賴既見寬能得衆必令師克在和臣仰窺五色之
書俯慰三竹之士喜氣高侵於畏日歡聲遠振於薰
風臣與將校等無任感恩激切榮抃屏營之至謹奉
狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂知之別除
廩鎮伏奉七月五日詔旨允許特賜獎飾者天從素
望風遶仙音既諧舉善之誠實叶分憂之寄伏以鍾

傳比從屬郡來援府城撫綏而使洽衆情禦備而能
成遠略高茂卿旣多梗阻不免回翔固難掉鞅而旋
豈許垂橐而八臣以戒之在闔事可從權遂具奏論
輒陳利害不料一言之善遽得動天終令二將之才
皆榮列土鍾陵江徼銅柱海隅政成而必有可觀恩
重而各得其所臣限拘鎮守不獲稱謝行在無任感
激兢灼之至謹奉狀陳謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中
餘並如故仍加食實封一百戶者九重降命萬里傳

聲側聆而踴躍忘疲內揣而怔忡失措伏以納言進
秩頒邑賞功固須德望鎮時仍有勲勞濟物然後方
可謂君無虛授臣無虛受如臣者謬提旄鉞免墜弓
裘空有志於四方竟無能於一割况自群兇蝟結戰
陣蛇奔狂鱗久戲於鼎中聖駕遠巡於劍外臣也動
不能剗烟塵之患靜不能瞻山海之資遂蒙改易兵
權分張權課雖值盤根錯節其如有斧無柯安邦之
計策何成富國之機謀莫就唯甘黜爵以警慢官豈
期陛下恩洽無偏義深宥過特超衆例許陟高資印
標石鵲之祥早懸不次冠聳金貂之飾愈覺非宜况

叨真食之榮實愧素餐之咎但屬狼星未滅鯨浪猶
翻方期抗旆以專征不敢懸車而請老謹當訓兵是
務殄寇為期粗中武弁之威仰報彤門之賞臣限守
藩鎮不獲稱謝行在無任感思戀聖戰汗屏營之至
謹奉狀陳謝以聞謹奏

謝秦彥等正授刺史狀

新授和州刺史秦彥

新授滁州刺史許勅

右件官臣先奏請各授管內刺史今月某日得進奏
院狀報伏奉某月日勅旨允許者九天降寵兩地分
榮觀降將之懷喜元戎之獲請伏以秦彥等比者

為梟為獍維虺維蛇久流螫蠱之災未有誅鋤之便
臣偶令招諭旋自歸投遂假分符皆能守節誠宜獎
勸輒具奏論今者聖澤濡枯皇風盪垢纔擲黃巾之
飾許登皂蓋之貨秦彥等既荷新恩永除舊惡必也
出榮建隼八効懸魚學其守土之規贖彼滔天之罪
臣限拘藩鎮不獲稱謝行在無任抃戴兢灼之至謹
奉狀陳謝以聞謹奏

桂苑筆耕集卷之四

奏狀十首

奏請從事官狀

奏請僧弘鼎充僧正狀

謝弘鼎充僧正狀

謝除姪男瓊授彭州九隴縣令狀

謝弟祝再除綿州刺史狀

謝姪男弘約改名濟除授揚州左司馬狀

奏請姪男劬轉官狀

奏請歸順軍孫端狀

奏李楷已下忝軍縣尉等狀

奏請楊行敏知廬州狀

奏請從事官狀

營田判官將仕郎殿中侍御史內供奉賜緋魚袋宋綯

右件官相門傳慶詞苑成名退居安東郭之貧就養
奉南陔之詠自忝戎幕備見良籌佐理而星霜屢遷
清勤而風雨不改久禪重任敢覬殊榮伏請轉官改
章服依前充職

攝鹽鐵巡官朝議郎守京兆府咸陽縣尉柱國高彥休
右前件官訓稟儒宗才無吏術王幾結綬早見勤勞
賓席曳裾頗多婉畫望憲臺之清秩助推筦之重權
伏請轉官依前充職 以前件狀如前伏以臣子之
所以立身者以孝以忠慎終如始若遂榮親之望必
勤事主之誠且如擇隣卜居斷織勵學至于成立色

養無虧能報慈母之恩則宋絢有焉又如教以義方
退而學禮至于仕官力行有規能遵嚴父之訓則彥
休有焉臣是以久籍謨猷仍嘉德行事堪勵俗志切
薦賢伏惟皇帝陛下思流域中孝理天下特迴唐獎
許假賓冀令修己從知盡以敬親務本干黷宸宸無
任兢惶謹錄奏聞伏聽勅旨

奏請僧弘鼎充管内僧正狀

右件僧跡洗四流心拘八政漢法於有緣之衆致功
於無 之言伏自翠華遠省於風謠丹詔屢徵於月
捷亮渠未滅銳旅猶勤弘鼎常令僧三十人晝夜轉

念功德張開覺道教化闔城所願早覆棗巢使迴駕
駕雖不關於至理實自發於精誠無緣當道屬郡既
多仁祠不少若無綱領難肅緇流伏乞聖慈俯詳所
請許充當道管内僧正仍賜紫衣所冀身掛金欄逞
養鷹之雋氣手持玉柄制醉象之狂徒謹緣奏聞伏
聽勅旨

謝許弘鼎充僧正狀

右件僧臣先具狀申奏請充當道管内僧正仍賜紫
衣伏奉勅旨依允者伏以弘鼎久勤轉念輒具薦論
能資十地之因遽荷九天之寵元戎獲請喜三教之

並行法侶歡呼驚一佛之或出唯真永持功德上報
慈悲苟不能盪火宅之餘災則何以稱水田之華服
必可潛然慧炬助滅妖氛臣限守藩條不獲陳謝行
在無任感戴兢灼之至謹奉狀陳謝以聞謹奏

謝除姪瓊官狀

前守京兆府鄠縣尉高 瓊

右件官是臣姪男今得進奏院狀報伏蒙勅旨除授
彭州九隴縣令仍賜緋魚袋者伏以高瓊早乏藝能
忝從祿仕佐理未闕於吏道列官已陟於王畿昨者
昔秦嶺而脫烟塵面蜀川而就雲日雖有心於葵藿

且無托於萍蓬豈料不由薦論便賜起擢纔拋黃綬
遽沾墨綬之榮始佩銅章又竊銀章之貴况乃濠陽
屬邑益部名區正當巡幸之邦實謂未蘇之地豈伊
殘劣能此勝當臣也必令行慎履冰坐勤飲水勉追
芳於花縣無致辱於竹林臣限守戎藩不獲稱謝天
庭無任感恩戰懼之至謹奉狀陳謝以聞謹奏

謝弟再除綿州刺史

綿州刺史高祝

右件官是臣堂弟今得進奏院狀報奉某月某日恩
制除授金吾將軍被軍州官衆狀舉留續准勅旨依

前授綿州刺史者恩資鳳宸喜集鵠原形影光輝精
魂震越伏以高祝早從裾履免墜其裘既懸報主之
誠得習牧人之術昨者忝膺寵寄粗舉故條銀水金
山曾無自潤帶牛佩犢或有可觀振家聲庶慎之名
致郡俗舉留之請况乃秩假帝之喉舌官登王之爪
牙仕宦既榮分憂又重祝也必遵勗勵更慎撫綏不
辜署劔之恩以謝擁轅之衆臣亦申教誨俾贖貪叨
俱在朝之盛儀雖慙前哲各為郡之清譽可畏後生
共資綽綽之詩冀播優優之政臣限拘藩鎮不獲稱
謝行在無任感恩抃躍之至謹奉狀陳謝謹奏

謝姪男弘約改名濟除授揚州大都府左司馬狀

朝散大夫前行閩州上元縣令柱國高弘約

右件官是臣姪男先具奏請除授揚州司馬并請改
名濟伏奉勅旨依允者九天渥澤萬里塗程沐恩命
於堯階泛光輝於阮巷負山既重臨谷何安臣以高
濟早列官裳頗聞吏術建業字人之政曾有微功惟
揚典午之資敢希薄授始陳丹青驟竊殊榮濟也譽
雖讓於王晞名不慙於程昱聖君如父照臨實表於
無偏猶子比兒訓勵必遵於匪懈俾申勤效少贖貪
叨臣限守藩條不獲稱謝行在無任感恩激切兢灼

之至謹奉狀陳謝以聞謹奏

奏請姪男勅轉官狀

前鄂州都團練副使朝議郎檢校祠部郎中
無侍御史柱國賜緋魚袋高勅

右件官是臣親姪男粗詳吏術早忝官業始佐理於
江陽徒從知於寒壤實得片言以折獄未嘗狂道而
事人遂荷寵榮已登班列尋叨命服久倅康車方當
寇盜喧驚亦有籌謀施展加以每遵家法願報國恩
宗族稱孝悌之名僚友許澆恭之行臣是以輒思內
舉敢具上陳引以進之守戴禮之深義惟善所舉憑

會書之美譚伏乞聖慈俯鑑忠懇特賜除授峽內刺
史劬也必能勵心從政常銘馬援之言竭力分憂不
負謝安之舉于黷宸扆無任兢惶謹錄奏聞伏聽勅
旨

奏薦歸順軍孫端狀

歸順軍都知兵馬使錄青光祿大夫檢校國
子祭酒兼左武衛將軍御史中丞上柱國孫端
右件官巢鳥知風園葵向日能投善教永載姦圖既
悛抗斧之心可在執爰之列仰希甄獎輒具奏論伏
乞聖慈特授一官勒在軍前驅使冀率感恩之衆永

除稔惡之徒謹錄奏聞伏聽勅旨

奏李楷已下密軍等狀

以前件狀如前伏以臣當府淮海與區州縣多事永
言屬吏實藉得人每憂興賦闕懸漸難責辦若俟銓
衡注擬恐失舉賢前件官等皆為君子儒有古人志
學優則仕既知祿在其中見善若驚不愧藝成而下
可以叅臣軍事可以代臣邑僚試假缺負願彰殊效
况抱班衣之樂冀攀黃綬之榮伏乞聖慈允臣所請
干冒宸鑒無任兢惶謹錄奏聞伏聽勅旨

奏揚行敏知廬州軍州事

右臣伏以武士所先惟忠與勇忠勇無著行敏有之
自假郡符能勤到銳旅有爭先之志齊吐無背怨之
詞蓋乃訓練齊戎撫綏周室在於巡屬實越革流累
具奏論請賜正授伏慮道塗艱阻未達宸聰每藉幹
能再陳薦舉永言成績可使頒條伏乞聖慈特賜允
許干蹟宸鑒無任兢惶謹錄奏聞伏聽勅旨

桂苑筆耕集卷之四

桂苑筆耕集卷之五

奏狀十首

奏誘降黃巢下賊將成令瓌狀

奏誘降福建道草賊狀

奏姪劬華州失守請行軍令狀

奏論天征軍任從海等衣糧狀

奏論抽發兵士狀
奏請叛將鹿晏弘授興元狀

進金銀器物狀
進漆器狀

進御衣段狀
進綾絹錦狀

奏誘降成令瓌

草賊黃巢下孽隊賊將成令瓌徒伴四萬人

馬軍七千騎

右件賊徒元受黃巢指使占據潼關尋自孽隊奔逃
所在燒劫就中斬黃管内最其傷殘臣伏以肅齊王
者之師必期無戰遵奉聖君之德可恕有瑕暫緩討
除先加告諭臣昨者專差押衙丁威賚委曲深入招
誘果願歸降無乞委任郡符展效忠節其成令瓌臣
當時補充軍前押衙無給功名檢校國子祭酒兼御
史中丞官告一通權知楚州軍州事以今月二十三
日部領手下兵士到楚州倒戈訖伏緣楚州與徐州
連水對岸今春曾被寇戎驟來攻劫雖頻討逐未盡

誅擒况漣水賊徒久蓄姦謀潛行偵諜常排戰艦欺
視孤城再欲奔衝終為患害臣以此特將此郡權授
令瓌既能投信義而來必得破頑兇之窟臣久臨戎事
素習軍謀以為患而後則誅兵家所貴遠者懷而近
者悅帝道方興上窺舍垢之恩下察慕羶之志不勞
寸刃唯假尺書成令瓌遂革野心能從天意叛徒四
萬盡為樂業之齊人精騎七千皆作輸忠之烈士既
當恕罪倍見感恩蜂飛之小寇旋銷蝟結之元兇可
殄斯乃陛下祝除三綱舞耀兩階信既洽於豚魚化
能移於梟獍善師不陣敢矜止殺之權至道無私但

仰好生之德其成令璩下願在軍門及故散人數請
續具申奏謹錄奏聞謹奏

奏招降福建道草賊狀

福建道溪洞草賊何嶠張延鄂璩棟等徒伴
共八萬人

右件賊徒自去年冬侵劫信州界內臣以其道途阻
闊溪洞險艱若欲討除恐為勞役遂於今年二月內
差節度衙推諸葛成充東面招諭使判官便費委曲
職牒招誘其賊首何嶠等三人雖行匪有師而卜能
從言一時應響三窟除姦纔當言下歸投無乞軍前

展效臣

委曲補職名追赴軍前俾申忠節臣伏

以小人興叛所迷者貪競之心上帝垂息所惡者殺傷之事終能耀德固可弭兵與其繼獻捷書曷若盡收降款是以遠飛折簡便倒群戈塵不假於身業風自行於偃草溪頭洞口免汚煙霞閩嶺鄱江密通道路况乃各期後效盡願前驅能令八萬餘人永不二三其意有以見陛下皇威天覆玄德日新四郊之煙壘將銷萬國之梯航競集則乃軍中士卒安身而永別戰場宇内生靈攜手而齊登壽域臣無任歌詠屏營之至其何嶠等下補職名願隨臣征行及放散人

數請續具申奏謹錄奏聞謹奏

奏姪男劬華州失守請行軍令狀

具銜高劬

右臣伏以備軍之將禮所興譏大義滅親傳曾垂訓
將爾安危之本必嚴賞罰之科竊自巨猾增驕王師
致討臣堂姪男劬比在河中司錄得受李 都指揮
領昭義之甲兵收華州之城邑稍申鷹犬之力暫挫
梟狼之聲已蒙特降殊恩俯旌微效服榮金紫位忝
星郎始離蒲坂之具寮遽假蓮峯之通守誠合率忠
勵勇馘醜摧兇稟進尺退寸之規決萬死一生之計

終申誠節仰報寵光昨者狂孽併來疲兵再戰既絕
安西之救難申逐北之威然而不能潤草塗原永忘
苟活仰使靡旗亂轍旋見脫歸致諸道之星分縱姦
徒之霧結職此之過罪無所逃豈可當二峯保守之
時遽沾寵賞及一陣奔亡之後得免誅夷國有常刑
軍無貸法懲一勸百念茲在茲伏乞聖恩特行嚴典
徇于藩鎮警彼師徒所冀國章永能安於社稷微臣
家法亦不昧於神祇干冒宸聰無任責躬泣血戰越
之至謹奉狀陳請以聞謹奏

奏請天征軍任從海衣糧狀

天征軍都將任從海及節級軍將并官健摠

二百八十七人

右臣得都將任從海及節級狀稱自赴征行已逾五載累曾沿海襲賊上江防虞去年軍都放回本道從海等且在當府願隨行營者各得家信知西川已停衣糧伏緣從海等皆是貧寒更無營業彼處父母親屬便湏委壑填溝請具奏論乞還衣糧者謹按史記釋云天子車駕所至則人臣為僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳

職居西蜀此方苦於羈旅彼已停其衣糧遠路音書
難徻征人之恨貧家親戚先懷餓殍之憂伏遇陛下
暫幸龜城未迴龍闕三川草木別有光榮萬戶烝黎
永能蘇息而任從海寺久離本鎮不睹殊恩望雨露
之均沾恨烟波之迥隔固堪傷憫輒具奏論伏乞聖
慈允臣所請特令本道却給全糧所冀鳳駕巡遊士
卒皆知其有幸鴻慈煦育君親必表於無私謹具錄
奏聞伏聽勅旨

奏論抽羨兵士狀

當道先准詔旨抽廬壽滁和等州兵馬共二

萬人仍委監軍使押領赴軍前者臣當時已
各帖諸州令排比點檢次又得進奏院狀報
近奉詔旨更於諸州催促兵士者

右臣伏以兵惟飾怒雖尚勇於戰征師克有和固推
誠於輯睦苟非得衆何以成功臣嘗管廬州與和州
舊有讎嫌至今疑忌唯謀以怨報怨未遂知和而和
孫端新授滁州又與秦彥有隙既是滁和接境動有
他虞若於光蔡會軍必酬舊憾事非便穩理合奏論
臣自得招降多方控馭粗能禁戢免有動搖如今各
出兵戈必恐自相魚肉輒陳利害冀慎始終謹錄奏

聞伏聽勅旨

奏請叛卒鹿晏弘投興元節度使狀

右當道賀正子將許令琮等今日日迴得狀稱三月五日陳許軍潰散節級鹿晏弘領兵馬二萬餘人打破金洋等州突入興元府坐節度使牛勗四日夜領隨從人并家累約二千餘人奔投龍州西山山谷者伏以天未悔禍地多受災既當易動難安非可懲一勸百鹿晏弘早駭散卒廣集叛夫始聆焚劫東都旋見奔衝西路本道節度使周岌累令招諭終不歸降豈興破浪之風但熾燎原之火今者逆黨則鯨吞盛府

元戎則鼠竄危途瓜距已成根株難剷儻或未恕亂
常之咎別興伐叛之師即恐終成一秦固應不利三
蜀且列藩貢獻諸道表章得達刀州皆由劔路况乃
鳳城已復鑾輅將旋縱令鷓鴣在天能摧拔窟若更
豺狼當道必彘行宮峽路雖通水程多慮不唯險阻
實且遐遙無至上江皆為賊境唯憂進獻莫遂通流
臣久竊寵光深懷驚憤遠詳事意輒具奏陳伏乞聖
慈霽雷霆之威迴雨露之澤速飛寬大之詔特委撫
綏之權庶晏弘免致磨驚便當豹變必當克已永務
安人聖主含弘既有其窮斯濫矣姦臣警悟亦免於

尤而效之謹錄奏聞伏聽勅旨

進金銀器物狀

金器 銀器

右臣伏以煙塵向息道路猶虞每慙仗鉞之榮多曠
獻琛之禮得申遠貢唯有輕賚前件金器銀器等質
變披沙形分鑄礫雖愧易盈之用且資虛受之功固
敢竭航波楫獻之心助麟趾馬蹄之瑞貢金三品空
陳任土之宜望闕九重未遂朝天之願感恩何極戀
聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九

百三十五事

右件漆器作非濫巧用得質良冀資尚儉之規早就
惟新之製雖有慙於瓊玉或可代於瑠瓶伏緣道路
多虞星霜屢換器貢難通於萬里綱行遂滯於三年
既失及時唯憂虛月臣今差押銀青光祿大夫檢校
太子賓客兼御史中丞上柱國辛從實押領隨狀奉
進謹進

進御衣段狀

當道先兼監織使織造中和四年已前御衣

羅折造布并綾錦等除光進納外續織造九千六百七十八段謹具如後物色

右臣久權莞貨素乏籌謀多虧山海之資莫報雲天之澤前件御衣并綾錦綺等薄慙蟬翼輕愧鴻毛然而舒張則凍雪交光疊積則餘霞闢彩既成功於鳳杼希八用於龍衣儉德彌彰致羨宜先於蔽冕皇恩遠燭輸誠必鑒於絲毫其正段物等臣謹差某官某押領隨狀奉進謹進

進綾綃錦綺等狀

進奉綾綃錦銀綺等一十萬疋段兩謹具色

目如後物色

右臣伏以兵戈充熾郡邑凋殘仰思御輦巡遊唯恨
賦輿懸闕况乃當道巡屬之內招降頗多皆請占留
將充供贍貴息寇戎之患難豐進獻之儀前件綾絹
錦綺等雖製自鴛機而價慙鮫室夏謝八蚕之号劣
登三品之名祇將申任土之宜豈足備補天之用輕
微既甚隕越何安其正段物色謹差節度散兵馬使
王審球等押領隨狀奉進謹進

桂苑筆耕集卷之五

桂苑筆耕集卷之六

堂狀十首

都統巡官侍御史內供奉崔致遠 撰

賀入蛮使迴狀

賀殺黃巢賊徒狀

賀收復京城狀

賀月蝕德音狀

賀內宴仍給百官料錢狀

請降詔旨指喻兩浙狀

謝加侍中兼實封狀

謝落諸道監鐵使加侍中兼實封狀

謝弟祝再除綿州狀

請轉官從事狀

賀入蠻使迴狀

右臣得進奏院狀報入南蠻通和使劉光裕等迴雲
南通和兼進獻國信金銀器物正段香藥信馬等漢

使傳詔則星迴象林蒙王奉琛則雲集龍闕能舉羈
縻之術果悛倔強之心若非聖上德叶棄瑕化敷柔
遠則何以感鑠耳鑠身之衆啓隳肝瀝膽之誠彼越
雉呈祥未爲盛觀旅藝入貢徒見良歲曷若正在艱
時能安獲俗使雲南酋長再遵奉贄之儀天下賢良
免獻征蠻之策斯皆相公魏絳陳利王商振威已令
六詔歸投即使八紘清謐某比者南尋銅柱西鎮劔
關曾施上將之謀免辱大君之命今則遠聆盛事倍
切歡心陳賀未由無任欣抃云云

賀殺黃巢賊徒狀

右得進奏院狀報定難軍拓跋相公保大軍東方達
尚書奏於宜君縣南殺賊徒并生擒賊將又鳳翔
李相公奏探知京中賊徒潰散六月十三日聖上御
宣政殿排仗受賀者竊以逆賊黃巢稔惡既多就刑
非久敢駟烏合之衆屢拒鷹揚之師拓跋相公東方
尚書或力微喬孫或曼倩餘慶皆申秘略共彌堯徒
能順天誅遂陳月捷軍名定難雅稱開張之聲縣號
宜君克符堯舜之德是以聖上高臨紫極遠耀皇威
睹百辟之歡呼雷驚蜀國想六師之勇戰電掃秦川
即當靜滅氛靈永見均施渥澤此皆相公調鼎中之

味運堂上之兵右援抱而得切左執律而至獻勲功
相繼稱慶何窮某久阻淮夷尚淹海徼遠聆捷語但
切歡聳然必願劔拂狼星旗迎聖日終繼張飛之拒
後不慙聶叔之致師限守戎藩末由陳賀下情無任
踴躍之至謹奉狀陳賀謹錄狀上

賀收復京城狀

右得河中節度使王司空牒報四月十日當道與鴈
門節度使李僕射及都監楊驃騎下諸道馬軍齊入
京城與賊軍交戰約殺賊步軍一萬餘人其馬軍賊
便走出城黃巢亦未知存亡其逃遁賊徒尋差兵馬

追奔並已收復京闕訖者伏以逆賊黃巢截姦匿暴
惡積禍盈久於輦下偷生固是檻中待死揚驃騎受
聖君之重寄李僕射傳飛將之雄名既無慮於二心
果有成於一力想其霜鋒電擊月羽風駟壓雀郊之
威高燎鴻毛之勢猛遂使賊巢困不能鬪亂無所歸
雖爲漏網之鱗已是傷弓之翼則期加顯戮永掃群
兇加以熊據六宮豕陔九陌今茲克復免致焚燒佇
望翠華便歸丹闕稍豁上天之怒實除下土之灾此
皆相公靜運廟謀遠揚戎略既叶一匡之妙道壯極
何憂將流萬古之美談東封可俟某登壇有忝伏鉞

無功遠聽歡聲始除慙色限拘守鎮陳賀未由下情
無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川
管內囚徒及委諸鎮收拾埋瘞京畿四面暴露骸骨
者伏以金精隱耀玉宸垂仁答天誠以震驚省風謹
而欽恤圓扉宥罪掃彗銷寃近鄙北齊號御囚而肆
虐遠遵西伯葬枯骨以施恩蜀山之草木先春秦甸
之煙塵永息此皆相公功成燮理道洽變通助日月
之光輝振雲雷之號令八方翹首萬彙歡心某跡繫

我旃心馳台室阻隨班列莫遂歡呼下情無任抃躍
之至謹奉狀陳賀謹錄狀上

賀內宴仍給百官料錢狀

右得進奏院狀報七月一日於內殿宴百官仍令度
支各給三箇月料錢并奉勅旨迴駕之日應沿路州
縣切不得輒進歌樂及屠殺者伏以聖上緝周匪業
避狄興憂自幸成都彌賢儉德守玄元之三寶達舜
帝之四聰徹彼琤肴掛其素服言唯罪已事不勞人
今者已復上京將迴大駕致栢梁之高宴盡醉千鍾
鄙鍊布之乏財均頒九府然後繼飛綸翰仍命繡衣

制郡邑之嚴科節道途之浮費既施令於好生惡殺
亦停歡於八列九成王化斯行物情皆泰此皆相公
手攜多士躬賀聖君鴛行賦在鎬之章鳳藻詠濟汾
之樂一時盛事萬代美談某限守藩條阻攀仙仗心
馳蜀棧目斷堯樽下情無任抃躍之至謹奉狀陳賀
謹錄狀上

請降詔旨指諭兩浙狀

右先准浙西周相公牒杭州與浙東兵士鬪敵某遂
具事由申奏請降詔書速令戢斂伏奉二月二十日
詔旨已詔兩浙務在叶和者某當時備錄王言各移

公牒訖無先差人賫書牒與劉漢宏尚書詰彼起戎之本諭其緝好之規今得迴書其言不讓唯稱周相公與董昌苟恃寵榮妄行威福虐侵近境阻截通津况有不同國之讎嫌又夫無蘊年之誓約必想見豺而戰猶能首鼠幸生已決加兵終期釋憾然則此無和氣彼有鬪心嘗膽者結怨既深抉眼者遺言可驗必恐以吳與越終當有越無吳實所謂夫差之麋鹿興譏范蠡之鼃鼃得便唯憂黎庶枉見殺傷輒再具狀奏陳請更飛詔止遏某徒圍鑿方枘避柱觸楹累陳高鳳之詞莫解子都之怒且讎因手足疾在腹心

久練師徒決期戰伐則也衛緣轉亂鄭蔓難除三人
是仇百姓何罪伏惟相公贊成睿略施展廟謀俾陳
兩武之事端唯仰一言之恩庇謹錄狀上

謝加侍中無實封狀

右得進奏院狀報伏奉十一月十一日恩制加授侍
中仍加食實封一百戶者伏以某材翰美箭葉紹良
弓早勤式遏之規敢怠聿修之訓遂得一分戎閫七
搜師壇提漢法之重權陵秦官之極品恩榮獨盛績
効何申况自蠆尾之徒蝟毛而起神州傾陷御輦巡
遊不能踴躍用兵有類遷延之役雖進退惟命不敢

爭功而行蔽相時豈無懷愧而又積山煮海瓜剖豆
分莫成贖國之權徒竊經邦之位唯甘廢棄永見沈
淪敢期渥澤之無私俯念涓埃之有效許登玉署高
戴金璫仍忝真封式加懋賞且如講能棄席諫切引
裾方升鳶渚之榮俾稱鳳池之望豈伊孱劣所可貪
叨此皆相公仰贊萬機俯安九牧無使怨乎不以能
令可者與之唯當三命益恭一辞無退入則撫安疆
圉出則誓掃氛霧佇成滅寇之功冀續曠官之責我
鎮有限不獲陳謝下情無任感恩兢懼之至謹奉狀

陳謝謹錄狀上

謝落諸道監鐵使加侍中無實封狀

右某伏奉去年十一月十一日恩制加授侍中並餘如故仍加食實封一百戶落諸道鹽鐵使者伏以君親委任固能捨短從長臣子忠勤唯願從微至著某一司推課六換暄涼正逢多事之秋莫展牢籠之用况自頻更統師別致租庸既當孤讓千皮實見羊分九牧贍軍富國固絕籌謀熬海鎔山幾隲條貫今者聖上恕其不逮察以無私將漢法之重權委儒流之妙術豈料更留宸慮猶念戎勲許登負重之班資不替擁旄之寵寄尚假極品重增實封當主憂臣辱之

時若斯榮盛審福過災生之理何以遑安此皆相公
曲庇庸虛全忘僭忝俾息躬於負重當銳志於專征
寧無淬礪之功仰荅陶鈞之賜此外以榮為懼至未
如初下情無任感戴兢惕之至謹奉狀陳謝云云

謝弟祝再除綿州狀

右件官是某堂弟今得進奏院狀報奉某月某日恩
制除金吾將軍被本州官吏衆狀舉留續准勅旨依
前充綿州刺史某嘗讀後漢書見寇恂為潁川守後
拜金吾從上經過潁川郡人遮道願借寇君乃留一
年以慰百姓此實國家殊寵郡邑美譚萬代之來一

人而已誰知盛事得屬鄙宗安貧恤孤潁川之政化
雖乏出官入仕子翼之官資略同感深而喜作悲端
效淺而榮為懼本伏以高祝粗閑吏術忝荷君恩分
憂而地壓劔關理俗而塵銷鈴閣今者纔升緹綺却
擁朱輪謂施撫阜之能特徇衆多之請此皆相公愛
忘其短仁及於微仰贊帝俞俯從群願某唯知提訓
俾慎揣摩同驅軾下之熊但期靜理雖睹堂前之鷺
免恨分飛限守戎藩末由陳賀云云

請轉官從事狀

某官薛礪

右件官閔損登科良由德行陳琳從職實假詞華林
幽而轉識芝蘭木落而方知松桂深敦操尚夙著翰
能遠叨分闈之榮唯籍運籌之妙伏請轉官仍改章
服轉充觀察判官

某官鄭倣

右件官早登上第久佐大藩能修檢慎之規每助撫
綏之政實筵所重健筆為先伏請轉官仍賜章服轉
充節度掌書記

某官顧雲

前件官東筠孕羨南桂抽芳曳謝眺之長裾從衛青

之軍幕五穀皮之為重豈謂虛譚百鷲鳥之不如方
知實事良資妙畫共展壯圖伏請轉官仍賜章服充
觀察支使以前件狀如前伏以某遠率舟師誓除國
賊征帆則雲掛行色戰鼓則雷含殺聲留務既繁良
籌是托或倚幕中之婉婉或求馬上之翩翩輒具薦
論仰希甄獎不拘月限別覲天恩伏惟相公庇護戎
藩激揚賓席稍超常例特受清資略儂潤於丹青許
分榮於朱紫所異元戎十乘速成討罰之功越府三
才各得施張之處已具狀申奏訖云云

桂苑筆耕集卷之六

桂花筆耕集卷之七

別紙二十首

滑州都統令公三首

鄭畋相公二首

史館蕭邁相公一首

度支裴澈相公一首

租庸王徽相公一首

太原鄭從謹尚書一首

禮部夏侯潭一首

吏部裴瓚尚書二首

宣歙裴尚書二首

鹽鐵李都相公二首

盧紹給事一首

壁州鄭尚書一首

泗州庾常侍一首

湖州杜孺休常侍一首

滑州都統王令公

狀見制書伏承榮加內史之任暫執元戎之權往鎮

雄藩誓殲窮寇行復宮闕則歸廟堂九重之倚賴如山八表之歡呼動地而况令公志勤捧日力贍補天三秉台衡兩分戎律八則建蕭何之功業出則振黃霸之恩威此皆群議稱揚不假拙辭贊詠今者聖上以叛徒乘便尚敢侮張諸道徵師互相逗撓蠢彼之姦克未弭赫斯之憤怒良深遂輟股肱遠資心膂為教宰楚設前茅後勁之規管仲相齊致九合一匡之譽是以榮轉西臺左相請為東道主人儒武全材古今罕遇伏想近承睿略嚴令諸侯誠知白馬封疆幸而獲賴必料蒼鵝群黨困不能飛即當立刻集巢去

迎奎駕海晏而永興龍德池清而再睹鳳儀允在含
靈皆增係望某靜思奮擊動見悔尤四隣多是異心
十道竟誰同力今所以自賀者得逢知己親掩貞師
巧屑無所構之端壯膽有可傾之處唯冀遙稟大將
軍之命用勵驍雄仰憑真宰相之威永除妖孽末由
陳賀下情不任欣慰瞻攀虔祝云云

第二

伏睹制書伏承榮膺寵命正鎮雄藩伏惟感慰竊以
動惟佐聖靜乃優賢百穀垂成則誓停霖雨八紘向
泰則貴息兵戈詎勞有道之人久練不祥之器群情

既鬱帝命斯行令公獨竭忠誠克扶厄運當六師扈
從司南之制度無虧及十乘啓行逐北之威稜有裕
但屬王事靡盬人心不同祖豫州志在誓江行申壯
節蕭相國力謀佐漢或致游詞今以小寇必殲大臣
于後慮失華夷之望倍興宵旰之憂遂乃鳳紙傳恩
遠離西蜀蜂旗卷影却到南燕指蹤既稟於成謀搏
噬行者於衆旅坐駟十道卧理百城顯為出入之寵
榮保就始終之勲業某夙銜深獎繼奉好音覽古人
賀滿之言睹君子持盈之節亦慰攀戀不任下情伏
惟云云

第三

伏承旋幢已到鎮上訖伏惟感慰令公手傾霖雨身
耀福星三八廟堂已超仲父一匡寰宇更屬何人昨
者十乘啓行九重軫慮以為螢不勞海灌邗何候山
摧遂請元臣却臨重鎮今則徐迴龍節靜撫雄師下
車而恩澤均沾舉扇而仁風廣振南燕受賜北極紓
憂某早荷奠知倍增欣慰云云

鄭畋相公二首

伏見二月六日制書伏丞相公正居宏父光弼聖君
兼撻蘭臺再調梅鼎凡云遠者近者莫不舞之蹈之

伏以相公碩德茂勲雄才與學播在四方之口沃於
萬乘之心固絕贊揚但增瞻仰况自關中聚寇岐下
屯兵率先諸侯累展竒略是以才趨鳳輦便陟鷲臺
遠涉山川行就九天之寵克平水土坐升百日之榮
竹宮既託於清規芸館更歸於雅望則乃孫叔敖之
慎守愈貴愈恭胡伯始之累遷有倫有要永憑上德
佇賀中興使仲父執鞭鄴侯捧轡驅蠢動入華胥之
域格蠻夷歸虞舜之風某早沐深知遠聆殊拜末由
陳賀抃聲倍添云云

第二

伏承太保相公累陳章表懇讓鉞衡暫輟任於股肱
果優賢於羽翼緇衣纁羨青綬加榮守難進易退之
規叶居安慮危之道莫不宸衷欽矚搢紳詠歌而况
相公比者統冠旬侯深攻國賊唱義聲而飛羽擢官
爵賞而練甲兵方驅破浪之風行滅燎原之火而乃
腹心有疾牙爪無功何君子之見欺實小人之難養
然而灾爲福始小往大來再秉洪鈞遠安仙蹕調鼎
中之實味運堂上之奇謀決勝漢籌弭灾魏闕皆憑
蕭丞相指蹤之力豈假鮑尚書統集之兵咸推第一
之功能贊登三之業今則奉身有裕止足無虧將尋

既傳之高蹤乃訪留侯之故事用黃石公之妙略蔚
為帝師從赤松子之勝遊別作仙侶雖云獨樂其奈
衆情氛曠餘妖方願靜銷於天下陶鎔重望豈宜久
滯於山中必計才返鳶旋請歸鳳闕永使蜩螿罷噪
仍令鹿馬分形深荷眷私况聯親懿依攀禱望可鑒
遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼外史館之榮
實副儒門之望竊以冊書所重筆削為難別成一代
之楷模復掩百王之規矩是得宸衷妙選朝列具瞻

而况相公真君子孺老成人德允釐百揆顯贊萬機
今者邦計既豐國經斯整東西臺之極位揚歷無遺
左右史之直言裁成有類莫不勳華表德游夏緘詞
能施補袞之功脩載垂衣之化必使褒真貶偽彰發
傳之體有三激濁揚清勵事君之心無二古今盛美
遐邇欽依某遠守藩維忝資陶冶每慎六條之理敢
希一字之褒抃躍所多啓陳無及伏惟俯賜念察

度支裴徹相公

伏睹除書伏承相公再履台席榮均賦輿凡在生靈
莫非欣躍某今之所賀者真以天上之福與大國之

幸不欲更率俗禮強飾繁詞然而歡心有餘祝史無
愧敢陳贊詠冀豁懇誠伏以相公德襲清通道資恭
儉歷遊華貫高陔台衡當聖君巡幸之初見賢相燮
諧之業而乃鵠原陷難鳳閣辭榮暫屈跡於外藩尋
秉權於大計今者天將悔禍日待外平果請英才却
歸舊位躡周司馬統兵之秩聘晉尚書較運之謀四
方所傳一意相賀其每慙薄伎偏荷殊私再逢調鼎
之期實切彈冠之望末由陳賀但增攀戀聳抃之至
云云

租庸王徽相公

伏睹制書伏承榮膺寵命伏惟感慰伏以萬乘巡遊
最難留事百官毗倚允屬持綱况當返駕之時九重
清宮之禮膺茲寵寄實在賢能司空相公靜抱長材
動施餘刃報主安人之業早冠鼎司束苴受獎之名
已諧輿輪今者鳴鳩命氏鷹隼揚威內清輦轂之塵
外肅闡畿之地聖君新命永託中庸司隸舊章行觀
大禮某忝承春煇欣抃實深云云

前太原鄭從謹尚書

得河中王相國書報伏丞相公榮膺寵命將赴京國
伏惟感慰伏以宸遊既遠居守是難須倚元臣方安

聖慮是故昔漢帝曰吾與僕射何異則知重寄別表
顯恩而况相公岳立儒宗川流相業頃辭鳳閣遠耀
龍旌郭伋示信之鄉廣沾恩化周舉移書之地遍活
疲羸肅軍令於貔貅振兵威於獯狁求安邊境胡雛
不敢南侵遽值妖氛周馥久勞西狩今以玉京雖復
鑾輅未迴輟戎略於藩垣託繁機於官闕必計中和
樂職已繼雅音司隸舊章即興盛禮然後重調梅鼎
永對奠階贊成天下之春固是彀中之事凡云品彙
莫不欣歡某早忝恩知倍增抃慰未由陳賀但切依

攀云云

禮部夏侯潭侍郎

伏承榮膺寵命伏惟感慰侍郎泰初朗鑒日月難踰
孝若美恣風塵莫染儒室別開其戶牖相門必繼其
弓裘是以始於憲府宣威便見儀曹主貢履歷而皆
遵仙路操持而永振貞風栢列朝霜昨日揖登臺御
史桂開夜月今朝選入室生徒採珠而蓬島待空搜
玉而藍峯寡色副天下正人之顯望息場中藝士之
屈聲某早沐春私不任欣抃云云

吏部裴瓚尚書二首

伏承榮膺寵命伏惟感慰竊以勛華聖代唯務舉能

邵泰賢流共推取實用捨既歸於重柄古今皆託於
長材人望所詣主恩斯在尚書情踈宦路性悅道風
月高而霜鶴數聲雲卷而蓮峯萬仞早知厄運久避
鶯氛洋川之瑞草仙花幾牽蝶夢闌苑之朝嵐暮靄
深潤豹姿然而陶鈞難住於山中塗炭待平於天下
遂辭肥遁來謁宸遊果登銓管之司允洽簪纓之望
昔年掌貢搜海嶽以皆空今日掄材酌淄澠而不混
清通所莅淆亂必除歷居六郡之峻資終補三台之
缺位遠祈通禱匪夕伊朝某早仰仙標遙欽懿範抃
慰瞻望不任下情云云

第二

伏以禮稱選士實資秀孝之科書貴知人允屬銓衡
之職君命既將歷試物情固得僉諧而况侍郎雲鶴
性情天驥行止瓌窓近日高批帝語於筆端絳帳生
風妙選群才於門下洎湖湘察俗瀍洛尹都便宜入
秉化權坐達聖略直以手能持滿心切避榮唯求勇
退之謀久阻惡徵之詔萬乘夢惠於隱霧四方渴望
於為霖今者移黜陟之司託清通之鑒何假山濤之
密啓能遵李重之良箴永期涇渭分流必使輪轅適
用某每思玉昆金季皆辱眷知松茂竹苞深敦交契

禱祝瞻戀並同衆誠伏惟云云

宣歙裴虔餘尚書二首

伏承榮奉徵詔將赴闕庭伏惟感慶無極今者妖氛
向息聖運重興諸葛亮之用兵已非惡務叔孫通之
制禮方藉賢才以尚書望積臯變政成宛旬三年察
俗以仁義爲先四境懷恩俾寇戎自戢是得傳巖結
夢宣室飛書黎庶傾心莫遂攀轅之懇君王聳耳待
聽曳履之聲况乃親侍安輿榮趨帝輦佇聆調鼎永
使建橐豈獨關中又安實爲天下幸甚其久隣仁境
深飽德風并慰瞻攀不任誠懇云云

第二

特垂手筆榮函無示陳情表冀捧尋無數欣賀有餘
且近者時風僅訛孝道多做事親則薄奉已為先只
將奔競榮身不以違離介意今睹尚書遠薛徽詔懇
致奏章叙向來為國分憂不矜茂績請從此於家就
養實稟格言况尚書若赴行朝必登相位而乃不親
梅鼎願奉板輿是逃台袞之榮唯戀班衣之樂永使
李虔之表萬古齊名仍令東哲之詩千秋長價有以
見聿修令問橫勵時流豈唯上德之美譚實乃中興
之盛事拜賀末由但切攀依之至云云

鹽鐵李都相公二首

伏承榮膺寵命無掌漕運伏惟感慰伏以鑄山熬海
既標富國之權紫帳皂檐固是安邦之彥况從多事
諒託全才相公中庸日彰大任天降舟楫暫妨於授
溺棟梁必俟於扶危今者三年禮成萬乘恩至假途
端揆正位司元憑孔僅之智謀繼齊桓之霸業必也
廣施竒計適致豐資答上帝之殊恩振中興之盛事
凡云品彙孰不欣歡某每慙糠粃居前久阻鹽梅入
用主張多失固難稱老成人交代叨榮無以告新令
尹抃慰兢惕不任下情拜賀末由攀戀空切云云

第二

每辱榮緘即垂虛譽周顛齋名於樂廣固是懷慙韓
非接傳於老聃實爲過望荷戴增切兢惶益深伏以
相公宋劔倚天曾戈駐日再居重任大洽群情必計
海若傾心廣潤煎熬之利山靈効力助成鎔鑄之功
便令流馬飛牛終得踰千越萬國用則立期饒羨廣
謨則坐致昇平勤王之誠在我而已伏惟遵護用慰
禱祠其他下誠已具前狀云云

盧紹給事

近睹除書恭承賢兄左丞榮膺寵命伏惟感慰竊以

國有司直野無遺賢蓋前代之所難實我朝之獨盛
况乃上可以紂彈八座下可以整肅百官永言其才
固屬全德賢兄左丞中庸處厚大雅含清柱晴空而
嶽頂無雲瑩秋色而潭心有月足得歷游華貫輝綽
令猷頃遇分憂暫作甘棠太守尋聆徵詔請為仙桂
主人此時也歡聲則風振儒林喜氣則雲鋪筆陣有
口皆賀無心不歸蓬島靈珠想離頷下荆山瑞玉待
入掌中而屬鶯谷藏春鳳城陷寇不見孔門盛事唯
傷魏闕餘定今者遠從行朝久臨憲府既躡清貨於
侍極榮升重位於肅機傳咸之畏慎無虧鄭晉之矜

莊有裕正當今日必繼芳塵給事避地經時陟崗勞
念今聆羨拜稍慰遠思然每於絳帳馳心共懷遺恨
須到洪鈞入手方洽群情高接鴈行佇迎鳳詔虔禱
瞻戀無以披陳云

壁州鄭凝績尚書

伏承自小司馬假大宗伯出刺始寧伏惟慶慰竊以
進有致君之志共託阿衡仕無擇祿之言常聆季路
綽然遺範宛若合符尚書玉樹一枝金山萬仞雅望
全騰於八海華資緩步於五雲漢丞相之傳經永光
儒室周司徒之善職固屬高門况乃於國於家曰忠

曰孝比者黃巾犯關翠輦省方尚書暫別鯉庭遠趨
鳳哀高提夢筆仰贊宸猷稟大聖之指歸立中朝之
張本此實為人臣之忠於國也今以聖主優賢嚴君
遜位尚書固辭武部峻陟儀曹榮掛兼衣俾歌廡禱
毛義之喜難自己胡威之清必衆知又爲人子之孝
於家也莫不事標雙美譽冠一時今彼郡而昔彼州
豈能較盛出傳舍而入官舍未足齊榮佇見風扇揚
名雲屏隔位隼旗高建免勞陟岵之詩龍鼎待調卽
展濟川之業某早銜春獎常切禱祠拜賀未期瞻攀
無極云云

泗州鄭度常侍

伏承已到貴鎮上訖伏惟感慰昔鄭弘爲臨淮太守
熊初架軾鹿乃挾輶既傳一郡之政聲終陟三公之
寵秩果符瑞應永振美譚今則常侍旌茂山東威臨
泗上實繼巨君之芳跡足分聖主之遠憂况乃沛師
戢兵淮民復業懸一城之愛日振四境之和風群情
允諧新命非遠某近封斯接殊眷先垂朴慰瞻攀但
切誠抱云云

湖州杜孺休常侍

昨睹除書伏承榮膺寵命再理吳興伏惟感慰常侍

比臨霽水大振袁風適聆高握新蘭又見重分舊竹
實謂政聲日哈人欲天從徵黃太守之書却隨鳳去
借寇使君之衆迎得春來自此煙封茗畦月挂蘋渚
不詠洞庭歸客即吟金谷主人再樂三年終蘇一境
然後八居青瑣坐演紫泥福庶品而既多掌陶鈞而
不晚某早銜珠眷抃慰實深拜賀末由瞻馳倍切云
云

桂苑筆耕集卷之七

桂苑筆耕集卷之八

別紙一十首

泗州子常侍

西川陳相公

徐州時司空三首

諸葛爽相公二首

湖南閔尚書

幽州李大王四首

滑州王令公

益鐵李相公二首

龍州裴尚書

西川柳常侍

史館蕭相公

三相公

翰林侯學士

泗州于濤常侍

常侍榮戴貂冠遠馭熊軾能施善政遍恤疲氓暫收

雄州已安樂國斯乃鄭巨君之甘雨再潤淮邊卜子
夏之儒風重興泗上况屬彭門叛亂仍當汴路艱難
獨守危城終推敵壘果成茂績實驗全才且群師悅
挾纊之心鄰孽縮吞舟之口仁者有勇信非虛譚其
昨奉詔書許令軍賞設爵而唯憑帝命舉賢而實契
私誠今則寵搜銀璫威無鐵柱敬申厚禮用報殊功
楚岸風聲處處而既傳滅寇隋堤柳色年年而祇望
行春拜賀未期瞻思頗切甚公牒同封送上云云

西川陳敬瑄相公

伏睹除書伏承相公以祝鳩之榮無大貂之貴禮登

八命寵冠三台伏惟感慶兼極伏以掌邦教之司無
人則闕負國重之任有德始居昔丁固休徵終叶生
松之夢戴憑奧學曾標棄席之名然十八年而既居
後時五十重而何益於事曷若相公雄臨上壘榮奉
金輿昔也坐振風謠作一方之慈父今乃立迎天寵
爲萬乘之主人使西夷免怨於後予南詔永知於戀
聖是以秩歸鳳闕化冷龜城躡高蹤於黃闥紫扉耀
偉質於朱衣皓帶豈獨一時之盛事實爲萬代之美
譚某早沐眷知不任欣抃云云

徐州時溥司空三首

竊以誓於晉乘則重其執贄往來諷以楚詞則愧彼
隨波上下永言有義有禮唯在知和而和况乃仁境
接邦之彥考善鄰存國之寶也始終相契今古何殊
去春特辱長牋無貽厚幣使者乃和門上校貺之以
華棧大宛引夏殷罪已之言鋪陳數幅舉邾魯息民
之義撫綏近封有以見真男子之用心古諸侯之行
事其於景仰豈可弭忘今遣專人聊馳微信匪足爲
報永以爲好伏惟照察

第二

司空利器倚天忠誠貫日授律而舉無遺策訓戎而

動有成功昨者窮寇驚奔銳師薄伐審麟史追逃之
勢展豹篇決勝之機靜剗群兇暗集戎首范丹縣側
雷威騰肅殺之聲季氏山邊天罰示告成之慶久留
盛績終屬雄才所謂有非常之人然後有非常之事
絳灌亦一時俊傑關張非累世勲庸鏤姓名於金鼎
玉鍾飾儀形於雲臺煙閣永言盡美孰敢爭先某幸
接德鄰深遵義路每增欣賀固異等倫云云

第三

特辱長牋俯傳大捷誘賊將而暗除梟師剗群兇而
遍戢豺聲夫何壯哉誠可畏也且黃巢謂逃天得計

乃揆日偷生書罪則竹之南山流惡則浪乾東海逞
暴於鋸牙鉤爪挺灾於金闕玉京煙氛所侵塗炭皆
匝諸道透相逗撓別自併張驅兵而未暇擐旗喪律
而先聆返旆養姦既久翫寇何安若非司空以當春
滋雨露之恩則坐迎龍節及初夏順雷霆之怒則立
展豹韜遂得纒發銳師果殲窮寇刷國家之積憤弭
州縣之餘殃所謂三年不飛終當一戰而霸况可飲
頭而快意何須擢髮以論辜有以見報聖天子之恩
固須待舉真將軍之令幸聯仁境先聽好音欣抃欽
矚翰墨何寄云云

諸葛奕相公二首

伏承親提師旅遠赴戰征跋履山川蒙犯霜露不審
近日尊體何似憑景周年寒威肅物令行麾下盡忘
鞭瘡之傷望峻竄中將救瘡痍之患必有百靈薦祉
七萃成功遠揚卻元帥之高名近繼郭汾陽之雄略
則銷氛稷遍活烝黎有心之徒引領而望伏惟每加
保重早副禱祈遠誠所望云云

第二

訪聆賊巢自逃高嶺久徧許田蔡師相連在鋒尚熾
當使以道途遠隔行止難知未施擒鹿之能但養斬

蛟之勇伏丞相公親麾八陣深運六韜將靜掃其群
堯已齊驅其銳旅既見三冬探甲即致殊功方知五
月渡瀘誠爲易事諸道固當高枕聖君便可迴鑾而
未測鯨奔項防歎搏凡居戎閫合審軍機輒遣專人
遠偵賊勢幸垂示及翼助討除伏惟照鑒謹狀

湖南閔頊尚書

親故前河西朱大夫到遠垂書示深荷眷私兼將尚
書弄馬圖及貴府祥瑞事跡相示閱覽忘倦欣仰有
餘且武藝所稱歷朝可數楚誇徹札魯銜蒙輪轡三
百斤之長弓嘗傳漢史掉八十斤之雙戟亦著魏書

然而唯守一隅莫能四達長於射而短於御力甚壯
而心甚怯永言戎役難遇全才今者尚書術繼白猿
名高赤兔既占萬人之敵真爲一代之雄雖居伏鉞
之榮不忘據鞍之勇爰徵粉繪妙寫風儀遍覽左旋
右抽唯知目駭神聳彼繫繩逞捷運甍服勤實謂區
區瑣瑣者尔况乃夢符捧日政洽觀風花竹呈祥果
驗中興之運龜龍薦感皆標上瑞之姿若非望重行
春歌喧來暮則何以三軍效勇永諧欽化之名七郡
懷恩盡表殊常之應必期渥澤繼入瀟湘此則但睹
其電擊雲飛鷹隼視每勞企想無以喻言唯望慎

舉政條仰酬寵寄方值四郊多壘實憑萬里長城其
他中心藏之永以爲好幸垂諒察云云

幽州李可舉大王四首

不審自履初夏尊體動止何如伏想趙盾日威雄臨
北塞素宏風化遙助南薰固當九郡懷恩百靈薦祉
符提白玉儼標萬里之長城臺築黃金遍啓四方之
賢路豈止應掛絲之夢自然超衣錦之榮伏惟精慎
寢興別迎寵冊永扶昌運大洽群情今遣諸葛果卿
假以郵巡修聘既愧未成好幣又慮或失良材無限
遠誠各具別狀云云

第二

雲龍在想風馬異區未由傾蓋之誠空切著鞭之望
雖傳鱗翼莫寫肺肝况某俯顧家門忝同里閭每詠
維棄之什即懷喬木之恩幸蒙侍中大王不賤家丘
深知國產曲垂厚獎頻辱好音然則苟能知心何假
會面以斯佩荷可鑒依攀今緣國患未除鄰讐不戢
甚欲慎言結舌其如憤氣填膺略假牋毫具陳事實
恃患子之知我望明王之鑒賢伏惟恩私遠察誠素
云云

第三

伏以蜂蟻巢窠猶能稔惡熊羆隊伍未見摧兇在於
義士忠臣莫不痛心疾首某蓋謂去年奉詔遂於近
境旋師然今若終不自行必恐竟無所就已從中夏
遍閱大軍待剡淮戎即登汴道但以指其百勝決此
一行人不異心事希同力侍中大王族榮周姓爵貴
漢封固多報國之誠常貯安邦之術見茲禍難忍不
憂勤某既事征行輒申控告伏望差借兵士助平寇
戎得貴藩精騎五千勝諸道羸師十萬仔收京闕尅
在旬時亦已先具奏陳所貴免成專輒申包胥之告
隱與此雖殊趙充國之請行于今可試幸垂亮察必

賜允從不敢獨擅茂勲所冀均分重賞忠誠之切實
在於斯伏惟永存始終早示可否未間顯望可想春
翹云云

第四

別奉榮緘遠搜古籍其於降歎無以喻陳且近者列
土諸侯盈庭多士唯以宦塗銳志少於儒術留心而
乃侍中大王博古通今去華取實無碣石之接土已
繼芳蹤漢維城之好書遠符仁旨是以訪遺編於汲
冢尋墜簡於魯宮然則荆軻易水之歌徒矜壯氣召
伯甘棠之詠虛播政聲豈若博采聖人之書用光君

子之道但懷鑽仰敢覲切磋况某久擁戎旃難親講
席耽讀闕五千卷之數箴貯無三十車之多自奉指
蹤願申誠懇通令列肆廣集異書異資日益之切寧
憚風詠之過必可徵名東觀承乏西齋伏惟俯賜鑒
察云云

滑臺王令公

某蒙息忝官不任感懼某粗傳堂構課荷國恩然而
術略素貧勲勞甚淺早分相印累陟師壇每遇福過
灾生盖為材微任重一自四郊多壘萬乘蒙塵來施
毫髮之功深負咽喉之寄羊皮狐腋空思趙簡子之

言瓦金黃鍾寧免楚大夫之歎既難展用唯願退閑
方欲瀝血拜章奉身請老豈料更隨衆例亦忝殊榮
遽登常伯之高資復益實封之異寵伐檀可懼橫草
何申伏緣通路不通制書未到先垂榮問過辱獎詞
既聆天上之音不愧月中之夢末由陳謝但切兢惶
云云

鹽鐵李都相公二首

其象息忝官不任感懼伏以納言峻秩真食殊榮有
扶持社稷之功有變理陰陽之術方居正位允洽群
情如其德之潤身智慙周物况逢多事未展壯圖動

無効於啓行靜有能於卧理加以久司筦貨實實實
謀既虧於富國贖軍深愧於木牛流馬唯甘黜削永
遂優閑豈料聖澤無偏戎藩有忝翰飛盡鹿昔年而
莫見休徵冠聳豐貂今日而愈慙非據仍加班邑何
報聖朝此皆僕射每賜保持得榮交伐唯期勵節共
願佳時陳謝未由依攀益切云云

第二

竊以世途易變時事難言泛泛如水中自安滔滔者
天下皆是雖董卓已燃巨腹衆切歡呼而桓彝若有
忠魂潛應慟哭每窺師律空激壯圖今則大駕未旋

外藩多難獲利者唯謀潤屋握兵者誰解清宮當道
雖乏供須但勤貢獻願早迴於御輦難空倚於賦輿
割占所因指撝斯在必希朗鑒深察鄙誠其他即遣
專人異具後狀云云

龍州裴峴尚書

遠勞專介特枉華絨發函睹不滅之蹤滿幅示相愛
之旨其於佩惠何以寄言且國步猶藉天心難測忠
直者韜聲戢影姦邪者鼓舌簸脣彼既一時此頃三
黜唯當竭節豈足興言尚書偶值危時暫淹雅望將
期歷試無限早栖龍辱若驚周柱史非無意也行藏

自保魯司寇有是言乎多謝故人勉報聖主分憂救
瘼為政非輕志操不虧恩榮斯在伏惟諒察云云

西州柳常侍

某頃鎮龜城別營雉堞蓋符天意得就土功今者幸
遇巡遊謂申績効久留御輦俾立豐碑杜元凱方愧
勲名李玄盛敢言德政雖忝當功受賞其如見寵若
驚常侍直道而行樂人之善遠垂華翰過辱獎詞以
永傳不朽之譚先見未來之事可使美掩蜀都之賦
高齊劍閣之銘荷戴兢慙無以指喻伏惟照察云云

史館蕭遘相公

某日無勞効天降寵光雖雨露常均不辭潤物而丘
山漸重莫遂安身况蒙相公察以獨立聖朝勤行直
道迥乖玷賴免使涇沉既闢洪爐辱陶鎔之厚賜仍
揮彩筆煩刻畫之妍詞以爲勳有成功前無強敵撫
寧淮甸靜戢煙塵繼陳任土之儀遠溼望雲之懇遂
使榮分畫室特解牢盆更增班邑之恩尚假統兵之
位仰窺華翰俯揣凡材未能息多壘之灾何以竊長
城之譽唯期激勵少報生成拜賜未前懷仁益切云
云

三相公

某蒙恩忝官不任感懼伏以風后古官是聖代弼諧
所重國僑羨賞非賢才負荷固難必也挺秀儒林鈞
深學海方可兼席占五十重之譽享秩稱二千石之
榮如其任重咽喉功微毫髮早提兵柄不能靜剗寇
戎久握利權無以廣資經費雖進退每從於帝命而
否臧實愧於軍謀以茲責躬無所逃罪但願罷歸林
藪絕望雲霄豈料宸襟猶傷墜履自上安下方慙盡
庶之幡居高飲清忽戴附蟬之冕解煩難於平准增
寵祿於寶封此皆相公啓導睿慈庇安戎律使貞金
鍊火免銷耗於毒煙直才摧霜更敷榮於聖日唯當

親驅銳旅遍討群兇冀成破竹之功以贖伐檀之刻
未由陳謝悚惕增深云云

翰林侯翻學士

某材略素貧勤勞甚薄謬蒙睿渥累陟華資今者拜
以古官加之真食伏蒙學士親奉宸睭過垂獎詞煩
郭璞之彩毫榮勝軒冕使夷吾之瑣器頓異斗筲遭逢
實契於百生銘鏤豈唯於一字但冀仰憑華陣更鍊
戎韜充國壯心早遂征行之望無鹽陋質免慙刻畫
之恩荷戴兢惶不任誠懇未由拜賜但切依攀云云

桂苑筆耕集卷之八